

KERAJAAN MALAYSIA

PARLIMEN MALAYSIA

DOKUMEN SEBUTHARGA

DOKUMEN NO.10

**PERKHIDMATAN PEMBERSIHAN *SOFTSCAPE* (MEMOTONG RUMPUT DAN
PENYELENGGARAAN TANAMAN LANDSKAP) DAN KERJA-KERJA
PEMBERSIHAN *HARDSCAPE* DI PARLIMEN MALAYSIA.**

No. Kontrak : PAR.2/367 SH.15/2019/K

PERJANJIAN ini dibuat pada haribulan 2019

ANTARA

KERAJAAN MALAYSIA yang bagi maksud Perjanjian ini diwakili oleh **PARLIMEN MALAYSIA** yang beralamat di Parlimen Malaysia, Bangunan Parlimen, Jalan Parlimen, 50680 Kuala Lumpur (selepas daripada ini dirujuk sebagai "KERAJAAN") bagi satu pihak;

DENGAN

..... suatu syarikat yang diperbadankan di bawah Akta Syarikat 1965 dan mempunyai pejabat berdaftar di (selepas daripada ini dirujuk sebagai "**KONTRAKTOR**") bagi pihak yang satu lagi,

(kedua-dua pihak **KERAJAAN** dan **KONTRAKTOR** akan dirujuk secara berasingan sebagai "**Pihak**" atau secara bersesama sebagai "**Pihak-Pihak**").

BAHAWASANYA –

- (a) **KERAJAAN** berhasrat untuk melantik **KONTRAKTOR** untuk Perkhidmatan Pembersihan *Softscape* (Memotong Rumput Dan Penyelenggaraan Tanaman Landskap) Dan Kerja-Kerja Pembersihan *Hardscape* Di Parlimen Malaysia bagi tempoh 7 bulan (selepas daripada ini dirujuk sebagai "Perkhidmatan tersebut") menurut skop yang ditentukan di dalam **Lampiran V**.

- (b) Melalui Surat Setuju Terima (SST) bertarikh..... **KONTRAKTOR** telah bersetuju menerima lantikan untuk memberikan Perkhidmatan tersebut kepada **KERAJAAN** tertakluk kepada terma-terma dan syarat-syarat yang dinyatakan dalam Perjanjian ini.

MAKA OLEH YANG DEMIKIAN adalah dengan ini dipersetujui seperti yang berikut:

1 TAFSIRAN

- (a) Kandungan Perjanjian ini, klausa dan Lampiran yang berkenaan atau mana-mana dokumen yang dirujuk dalam perjanjian ini dianggap, dibaca dan ditafsirkan sebagai penting dan membentuk sebahagian daripada Perjanjian ini. Walau bagaimanapun, sekiranya berlaku pertikaian mengenai mana-mana dokumen yang membentuk Perjanjian ini, keutamaan dokumen seperti yang berikut hendaklah terpakai:
- (i) klausa-klausa;
 - (ii) lampiran-lampiran; dan
 - (iii) apa-apa dokumen lain yang dirujuk dalam Perjanjian ini;
- (b) semua rujukan kepada kandungan Perjanjian ini, klausa dan Lampiran adalah merupakan rujukan kepada kandungan Perjanjian ini, klausa dan Lampiran dalam Perjanjian ini;
- (c) semua rujukan kepada peruntukan undang-undang adalah termasuk peruntukan yang telah dipinda, disemak dan digubal semula;
- (d) perkataan "undang-undang" adalah bermaksud mana-mana undang-undang terpakai pada masa kini dan pada masa hadapan dan mana-mana perlembagaan, dikri, penghakiman, perundangan, arahan, ordinar, statut, persefahaman, arahan direktif, undang-undang kecil, undang-undang dan peraturan yang dipinda dari semasa ke semasa;
- (e) perkataan-perkataan yang terpakai bagi individu juga hendaklah terpakai bagi orang perseorangan, syarikat, perbadanan, firma, perkongsian yang diperbadankan atau tidak diperbadankan;
- (f) ungkapan "Perjanjian ini" atau mana-mana ungkapan yang serupa hendaklah terdiri daripada kandungan Perjanjian ini, klausa dan Lampiran dan termasuk apa-apa perjanjian tambahan bertulis kepadanya sebagai boleh dilaksanakan dan berkuat kuasa dari semasa ke semasa atau bila-bila masa;

- (g) perkataan-perkataan yang bermaksud suatu jantina hendaklah termasuk jantina yang lain;
- (h) rujukan kepada peruntukan-peruntukan undang-undang adalah juga merujuk kepada jumlah majmuk dan juga sebaliknya;
- (i) tajuk dan subtajuk kepada klausa di dalam Perjanjian ini adalah untuk rujukan mudah semata-mata dan tidak harus menjejaskan definisi dan tafsiran kepada klausa tersebut;
- (j) mana-mana perkataan atau ungkapan ditakrifkan dalam Perjanjian ini hendaklah diperluas kepada semua variasi tatabahasa dan ungkapan seasalnya perkataan atau ungkapan yang ditakrifkan sedemikian;
- (k) bagi maksud pengiraan apa-apa tempoh masa yang dinyatakan dalam Perjanjian ini atau apabila sesuatu perbuatan dikehendaki dilakukan dalam tempoh yang dinyatakan atau dari suatu tarikh yang dinyatakan, maka tempoh tersebut adalah termasuk dan mula berjalan dari tarikh yang dinyatakan sedemikian;
- (l) mana-mana rujukan kepada masa yang memerlukan sesuatu perbuatan perlu dilakukan atau perjanjian dicapai atau persetujuan diberikan, sebutan itu hendaklah disifatkan dibaca sebagai termasuk ungkapan atau apa-apa tempoh yang lain yang dipersetujui secara bertulis antara Pihak-Pihak dari semasa ke semasa;
- (m) mana-mana terma teknikal yang tidak didefinisikan secara khusus, hendaklah ditafsirkan selaras dengan penggunaan atau definisinya yang lazim diterima di dalam bidang dan industri berkenaan di Malaysia;
- (n) mana-mana rujukan kepada "hari bekerja" adalah merujuk kepada selain hari Sabtu, Ahad (kecuali bagi negeri-negeri di mana hari Ahad adalah hari bekerja, rujukan itu tidak termasuk hari Jumaat dan Sabtu) dan mana-mana hari lain yang diisytiharkan oleh Kerajaan Malaysia sebagai cuti umum dan apa-apa rujukan kepada "hari", "minggu", "bulan" atau "tahun" adalah untuk hari, minggu, bulan atau tahun itu mengikut kalendar Gregorian;
- (o) mana-mana rujukan kepada perkataan "bertulis" atau ungkapan seasalnya, adalah termasuk apa-apa komunikasi yang dilaksanakan

melalui penghantaran pos, faksimili, mel elektronik atau cara lain yang setanding dengannya; dan

- (p) mana-mana rujukan untuk “kelulusan”, “notis” atau “persetujuan” hendaklah bermaksud kelulusan, notis atau persetujuan bertulis, melainkan jika dinyatakan sebaliknya.

2 SKOP PERJANJIAN

Adalah dipersetujui bahawa **KONTRAKTOR** akan Perkhidmatan Pembersihan *Softscape* (Memotong Rumput Dan Penyelenggaraan Tanaman Landskap) Dan Kerja-Kerja Pembersihan *Hardscape* Di Parlimen Malaysia bagi tempoh tujuh (7) bulan kepada **KERAJAAN** menurut skop dan spesifikasi yang ditentukan di dalam **Lampiran A** menurut terma dan syarat Perjanjian ini.

3 TEMPOH PERJANJIAN

- 3.1. Perjanjian ini hendaklah disifatkan sebagai mula berkuat kuasa mulai(selepas daripada ini dirujuk sebagai “TEMPOH PERJANJIAN”).
- 3.2. **KONTRAKTOR** boleh memohon kepada **KERAJAAN** secara bertulis bagi suatu pelanjutan TEMPOH PERJANJIAN tidak kurang daripada tiga (3) bulan sebelum TEMPOH PERJANJIAN tamat sekiranya **KONTRAKTOR** berniat untuk melanjutkan TEMPOH PERJANJIAN.
- 3.3. **KERAJAAN** mempunyai budi bicara mutlak untuk mempertimbangkan permohonan sedemikian dan sekiranya permohonan tersebut dipertimbangkan dan dibenarkan, Pihak-Pihak boleh secepat yang mungkin selepas **KERAJAAN** membenarkan permohonan tersebut membincangkan terma dan syarat bagi pelanjutan tersebut tidak kurang daripada satu (1) bulan sebelum TEMPOH PERJANJIAN tamat.
- 3.4. Dalam hal keadaan Pihak-Pihak tidak dapat mencapai persetujuan, Perjanjian ini hendaklah tamat serta-merta para tarikh TEMPOH PERJANJIAN tamat.

4 NILAI PERJANJIAN

- 4.1 Bagi maksud Perjanjian ini dan tertakluk kepada pematuan syarat-syarat dan terma Perjanjian oleh **KONTRAKTOR**, **KERAJAAN** bersetuju membayar kepada **KONTRAKTOR** sebanyak

..... [RM.....] (selepas daripada ini dirujuk sebagai "NILAI PERJANJIAN").

- 4.3 NILAI PERJANJIAN yang dinyatakan di dalam klausa 4 Perjanjian ini adalah tetap dan apa-apa permohonan bagi tujuan pertambahan pembayaran NILAI PERJANJIAN oleh Pihak **KONTRAKTOR** tidak akan dibenarkan melainkan dipersetujui melalui pindaan kepada Perjanjian ini.
- 4.5 **KERAJAAN** tidak akan bertanggungjawab memenuhi apa-apa tuntutan berhubung dengan pelaksanaan Perkhidmatan oleh **KONTRAKTOR** yang melebihi NILAI PERJANJIAN walaupun ia dilaksanakan atas arahan Pegawai yang diberi kuasa melainkan jika pindaan telah dibuat terlebih dahulu mengikut cara yang dinyatakan di dalam Perjanjian ini.

5 BON PELAKSANAAN

- 5.1 **KONTRAKTOR** hendaklah sebelum menandatangani Perjanjian ini menyerahkan kepada **KERAJAAN** suatu Bon Pelaksanaan dalam bentuk Jaminan Bank bernilai **Ringgit Malaysia** (RM.....) yang bersamaan dengan lima peratus (5%) daripada Harga Perjanjian ("Bon Pelaksanaan") sebagai suatu jaminan kepada pelaksanaan obligasi-obligasi **KONTRAKTOR** di bawah Perjanjian ini.
- 5.2 Bon Pelaksanaan hendaklah dalam bentuk jaminan bank daripada mana-mana bank yang dilesenkan perniagaan di Malaysia dan diluluskan oleh Kementerian Kewangan.
- 5.3 Bon Pelaksanaan itu hendaklah kekal sah laku sehingga dua belas (12) bulan selepas tamatnya Perjanjian ini.
- 5.4 **KERAJAAN** berhak pada bila-bila masa untuk membuat tuntutan terhadap keseluruhan atau sebahagian daripada Bon Pelaksanaan berhubung dengan apa-apa pelanggaran terma atau syarat yang diperuntukkan dalam Perjanjian ini oleh **KONTRAKTOR** tanpa menjejaskan hak **KERAJAAN** untuk mengambil tindakan undang-undang yang lain.
- 5.5 Sekiranya tuntutan dibuat oleh **KERAJAAN** ke atas Bon Pelaksanaan tersebut yang menyebabkan jumlah jaminan bank tersebut berkurangan daripada jumlah yang dinyatakan dalam klausa 5.1, **KONTRAKTOR**

hendaklah mengemukakan suatu Bon Pelaksanaan tambahan supaya nilai Bon Pelaksanaan yang dipegang oleh **KERAJAAN** tidak kurang daripada tuntutan yang dibayar kepada **KERAJAAN** pada atau sebelum tarikh tuntutan itu supaya jumlah jaminan bank tersebut akan kekal pada setiap masa pada jumlah yang dinyatakan dalam klausa 5.1.

- 5.6 Bon Pelaksanaan yang dinyatakan dalam klausa 5.1 akan dikembalikan kepada **KONTRAKTOR** selepas tarikh tamat tempoh Bon Pelaksanaan.

6 PEMBAYARAN

- 6.1 Bagi maksud pembayaran, **KONTRAKTOR** hendaklah mengemukakan invois lengkap bersama dokumen yang berkaitan **KONTRAKTOR** kepada:

**Ketua Pentadbir Parlimen Malaysia
Seksyen Kewangan dan Akaun
Parlimen Malaysia
Bangunan Parlimen
Jalan Parlimen
50680 KUALA LUMPUR.**

- 6.2 Invois hendaklah disahkan oleh Pegawai di Bahagian/Seksyen/Unit yang berkaitan.
- 6.3 Tanpa menafikan hak-hak **KERAJAAN** yang lain dalam Perjanjian ini, sekiranya pihak **KONTRAKTOR** melanggar apa-apa terma atau syarat dalam Perjanjian ini, pihak **KERAJAAN** berhak memotong NILAI PERJANJIAN yang ditetapkan kepada **KONTRAKTOR**.
- 6.4 **KONTRAKTOR** hendaklah mengemukakan bil/tuntutan yang lengkap dalam tempoh 14 hari dari tarikh bekalan atau perkhidmatan dibekalkan atau kerja disempurnakan untuk membolehkan bayaran dibuat segera. **KERAJAAN** tidak akan bertanggungjawab atas kelewatan pembayaran kepada **KONTRAKTOR** jika bil/tuntutan tidak dihantar segera dalam tempoh 14 hari tersebut.

7 REPRESENTASI DAN WARANTI

- 7.1 **KONTRAKTOR** dengan ini membuat representasi dan waranti kepada **KERAJAAN** bahawa –

- (a) ia adalah sebuah syarikat yang sah yang ditubuhkan di bawah undang-undang Malaysia;
- (b) ia mempunyai kuasa untuk membuat dan melaksanakan tanggungjawab serta urusan di bawah Perjanjian dan mempunyai kapasiti di sisi undang-undang untuk membuat dan melaksanakan obligasinya di bawah Perjanjian ini dan untuk menjalankan apa-apa transaksi dan menjalankan perniagaannya sebagaimana yang dihasratkan oleh Perjanjian ini;
- (c) ia telah mengambil langkah-langkah yang perlu bagi membuat dan melaksanakan tanggungjawab serta urusan di bawah Perjanjian ini;
- (d) pada bila-bila masa pelaksanaan Perjanjian ini, pelaksanaan Perjanjian ini tidak menyalahi mana-mana peruntukan sama ada –
 - (i) Memorandum dan Artikel Persatuannya; atau
 - (ii) mana-mana dokumen atau perjanjian yang mengikatnya atau asetnya;
- (e) ia adalah suatu syarikat yang berdaftar pada setiap masa dengan Kementerian Kewangan melainkan diberikan pengecualian secara bertulis oleh **KERAJAAN**;
- (f) tiada apa-apa litigasi, tuntutan cukai, timbangtara, pertikaian atau prosiding yang sedang atau telah berlangsung yang pada pengetahuannya akan memberi kesan negatif terhadap keupayaan kewangan atau obligasinya di bawah Perjanjian ini;
- (g) bahawa ia tidak mempunyai apa-apa pengetahuan, pada tarikh Perjanjian ini, tentang apa-apa perkara di dalam kawalan semunasabah yang mungkin atau akan sebaliknya menjejaskan keupayaan untuk menjalankan obligasinya di bawah Perjanjian ini dan bahawa ia mempunyai kepakaran dan kemahiran untuk menjalankan obligasi-obligasinya di bawah Perjanjian ini,

dan **KONTRAKTOR** mengambil maklum bahawa **KERAJAAN** telah membuat Perjanjian ini berdasarkan representasi dan waranti di atas.

7.2 Representasi Berterusan

KONTRAKTOR lagi memberi jaminan dengan **KERAJAAN** bahawa representasi dan waranti yang dinyatakan dalam klausa 7.1 akan tetap benar dan betul dalam semua aspek material sepanjang tempoh Perjanjian ini.

7.3 Kebergantungan kepada **KONTRAKTOR**

KONTRAKTOR mengakui bahawa **KERAJAAN** bergantung sepenuhnya dan semata-mata kepada kemahiran **KONTRAKTOR**, pertimbangan dan kepakaran dan sewajarnya **KONTRAKTOR** bertanggungjawab kepada **KERAJAAN** bagi apa-apa kerugian dan kerosakan sekalipun, yang timbul secara langsung atau tidak langsung berkaitan dengan Perjanjian ini.

8 OBLIGASI KONTRAKTOR

KONTRAKTOR hendaklah –

- (a) melaksanakan Perkhidmatan tersebut dan obligasinya di bawah Perjanjian;
- (b) melaksanakan tanggungjawabnya dengan baik berdasarkan amalan pengurusan yang baik, mengutamakan kepentingan **KERAJAAN** dan hendaklah mematuhi undang-undang yang berkuat kuasa;
- (c) melaksanakan Perkhidmatan tersebut dengan mengambil semua langkah yang diperlukan oleh seseorang **KONTRAKTOR** yang memberikan perkhidmatan yang sama bagi memastikan Perkhidmatan tersebut mematuhi semua kehendak di bawah Perjanjian ini;
- (d) melaksanakan Perkhidmatan tersebut dan menjalankan obligasinya sebagaimana yang terkandung dalam Perjanjian ini dengan menggunakan kemahiran, kepakaran serta teliti dalam menyempurnakan obligasinya. Dalam melaksanakan Perkhidmatan tersebut, **KONTRAKTOR** hendaklah menyenaraikan semua perkhidmatan yang diperlukan, kemudahan dan kakitangan sebagaimana yang dinyatakan dalam Perjanjian ini. **KONTRAKTOR** juga hendaklah menyediakan prosedur dalam bentuk yang dipersetujui oleh **KERAJAAN** bagi maksud melapor dan menyelaras;

- (e) pada setiap masa melaksanakan Perkhidmatan tersebut dalam apa-apa cara yang akan sentiasa menjaga dan melindungi kepentingan **KERAJAAN** dan mengambil langkah yang perlu dan yang bersesuaian untuk tidak menyalahgunakan atau membazir kemudahan yang diberikan, sekiranya ada, yang diberikan oleh **KERAJAAN** kepada **KONTRAKTOR**;
- (f) memaklumkan kepada **KERAJAAN** secepat mungkin secara bertulis jika terdapat apa-apa faktor atau keadaan yang boleh mempengaruhi Perkhidmatan tersebut. Makluman tersebut tidak akan dianggap sebagai suatu pelepasan terhadap apa-apa obligasi **KONTRAKTOR** di bawah Perjanjian ini;
- (g) menyediakan dan memastikan bilangan dan kategori kakitangan yang berkecukupan dan mahir secukupnya sepanjang tempoh Perjanjian;
- (h) hendaklah menyediakan dengan kos sendiri dan memberikan segala kelengkapan dan bahan yang diperlukan bagi melaksanakan Perkhidmatan tersebut secara efektif dan baik;
- (i) hendaklah menyelenggara inventori yang baik bagi kemudahan, kelengkapan dan apa-apa aset yang disediakan oleh **KERAJAAN** dan **KERAJAAN** hendaklah mempunyai hak untuk menjalankan audit kepada inventori tersebut dari semasa ke semasa;
- (j) hendaklah dengan kos sendiri menyediakan kakitangan pakar, perunding atau ejen yang diberi kuasa bagi maksud menjalankan dan melaksanakan Perkhidmatan tersebut;
- (k) memberi arahan dan menyelia semua pekerjaannya yang melaksanakan Perkhidmatan tersebut dan memantau penyediaan spesifikasi Perkhidmatan tersebut ketika Perkhidmatan tersebut dilaksanakan dan juga selepas Perkhidmatan tersebut dilaksanakan;
- (l) apabila diminta oleh **KERAJAAN**, memeriksa dan mengemukakan data yang berkaitan bagi maksud pengubahan atau penambahan dalam Perjanjian ini;
- (m) memastikan rekod yang berkaitan dengan Perkhidmatan tersebut diselenggara dengan baik pada setiap masa dan rekod tersebut hendaklah pada bila-bila masa yang munasabah tersedia bagi maksud

pemeriksaan oleh pegawai yang diberi kuasa atau juruaudit yang diberi kuasa oleh **KERAJAAN**.

9 TANGGUNGJAWAB KERAJAAN

KERAJAAN hendaklah –

- (a) membuat bayaran kepada **KONTRAKTOR** berdasarkan syarat-syarat dan terma-terma pembayaran yang telah ditetapkan dalam klausa 6;
- (b) memberikan kerjasama yang sewajarnya bagi menjayakan sepenuhnya Perkhidmatan tersebut; dan
- (c) memaklumkan kepada **KONTRAKTOR** sekiranya wujud apa-apa perubahan hal keadaan yang boleh mempengaruhi Perjanjian ini sekurang-kurangnya empat belas (14) hari sebelum tarikh perubahan.

10 PENAMATAN PERJANJIAN

10.1 Penamatan oleh KERAJAAN

10.1.1 Sekiranya **KONTRAKTOR** tanpa apa-apa sebab yang munasabah:

- (a) menangguhkan pelaksanaan Perkhidmatan tersebut;
- (b) gagal memberikan Perkhidmatan tersebut secara tekun dan berterusan;
- (c) gagal memberikan Perkhidmatan tersebut atau gagal menjalankan obligasi seperti yang dipersetujui di bawah Perjanjian ini;
- (d) melakukan pelanggaran terhadap mana-mana syarat atau terma Perjanjian ini,

KERAJAAN hendaklah memberi notis secara bertulis kepada **KONTRAKTOR** dengan menyatakan butiran mengenai kemungkiran itu dan meminta **KONTRAKTOR** untuk meremedikannya dalam tempoh tiga puluh (30) hari selepas tarikh notis itu. Sekiranya **KONTRAKTOR** gagal untuk meremedikan kemungkiran itu dalam tempoh yang dinyatakan

atau mana-mana tempoh lain yang ditetapkan oleh **KERAJAAN**, **KERAJAAN** berhak menamatkan Perjanjian ini pada bila-bila masa selepas itu dengan memberi notis untuk tujuan penamatan tersebut.

10.1.2 **KERAJAAN** berhak dengan serta-merta menamatkan Perjanjian ini sekiranya –

- (a) **KONTRAKTOR** pada bila-bila masa menjadi bankrap atau satu perintah penerimaan atau pentadbiran dibuat terhadapnya; atau
- (b) Seorang penerima atau pengurus bagi pihak seseorang pemiutang dilantik atau jika timbul keadaan-keadaan yang memberi hak kepada Mahkamah atau seseorang pemiutang melantik seorang penerima atau Pengurus, atau yang memberi hak kepada Mahkamah membuat suatu perintah penggulungan.

10.2 Penamatan atas Kepentingan Awam

- (a) Walau apa pun peruntukan di bawah Perjanjian ini, **KERAJAAN** boleh menamatkan Perjanjian ini dengan memberikan notis tidak kurang daripada tiga puluh (30) hari kepada **KONTRAKTOR** (tanpa apa-apa obligasi untuk menyatakan alasan berbuat demikian) setelah mempertimbangkan bahawa penamatan itu perlu untuk kepentingan awam, kepentingan keselamatan negara, atau atas sebab polisi **KERAJAAN** atau polisi awam;
- (b) Bagi maksud klausa ini, apa yang mewujudkan “kepentingan awam”, “kepentingan keselamatan Negara”, “polisi kerajaan” dan “polisi awam” hendaklah secara keseluruhannya dibuat dan ditentukan oleh **KERAJAAN**. Segala penentuan tersebut adalah muktamad dan konklusif dan tidak boleh dicabar.

10.3 Penamatan atas sebab rasuah, aktiviti-aktiviti yang tidak sah atau menyalahi undang-undang

- (a) Tanpa prejudis kepada mana-mana hak **KERAJAAN** yang lain, jika **KONTRAKTOR** atau sesiapa yang diambil bekerja olehnya atau bertindak bagi pihaknya disabitkan oleh mana-mana mahkamah undang-undang bagi rasuah atau apa-apa aktiviti yang menyalahi

undang-undang berhubung dengan Perjanjian ini atau mana-mana perjanjian lain antara **KERAJAAN** dengan **KONTRAKTOR** tersebut, sekiranya ada, **KERAJAAN** berhak untuk menamatkan Perjanjian ini pada bila-bila masa dengan memberikan notis bertulis dengan serta-merta kepada **KONTRAKTOR** bagi maksud itu;

- (b) Akibat daripada penamatan tersebut, **KERAJAAN** berhak menuntut segala kerugian, kos, ganti rugi dan perbelanjaan termasuk apa-apa kos dan perbelanjaan sampingan yang ditanggung oleh **KERAJAAN**; dan
- (c) Bagi mengelakkan keraguan, Pihak-Pihak dengan ini bersetuju bahawa **KONTRAKTOR** tidak berhak ke atas apa-apa bentuk kerugian termasuklah kehilangan keuntungan, ganti rugi, tuntutan atau apa-apa pun berikutan daripada penamatan Perjanjian ini.

10.4 Penamatan oleh **KONTRAKTOR**

Sekiranya **KERAJAAN** tanpa apa-apa sebab yang munasabah gagal membuat bayaran kepada **KONTRAKTOR** seperti yang dipersetujui di bawah Perjanjian ini setelah tuntutan pembayaran, menerima invois dan dokumen sokongan yang lengkap daripada **KONTRAKTOR**, **KONTRAKTOR** hendaklah memberi notis bertulis kepada **KERAJAAN** dengan menyatakan butiran mengenai kemungkiran itu dan meminta **KERAJAAN** untuk meremedikannya dalam tempoh tiga puluh (30) hari selepas tarikh notis itu. Sekiranya **KERAJAAN** gagal untuk meremedikan kemungkiran itu dalam tempoh itu atau mana-mana tempoh lain yang dipersetujui oleh Pihak-Pihak, **KONTRAKTOR** berhak menamatkan Perjanjian ini pada bila-bila masa selepas itu dengan memberi notis untuk tujuan itu.

10.5 Kesan Penamatan

Sekiranya Perjanjian ini ditamatkan mengikut klausa 10.1, 10.2, 10.3 dan 10.4 di atas, maka –

- (a) kesemua kuasa, hak dan obligasi yang diperuntukkan di dalam Perjanjian ini akan tamat serta-merta;
- (b) Pihak-Pihak akan membayar dan menyelesaikan apa-apa jumlah wang yang masih belum dibayar dan kena dibayar kepada Pihak yang satu lagi sebelum penamatan Perjanjian ini; dan

- (c) penamatan Perjanjian ini tidak akan menjejaskan hak-hak mana-mana Pihak yang telah terakru sebelum penamatan Perjanjian ini.

11 HAK KERAJAAN MENDAPATKAN KHIDMAT PIHAK KETIGA

- 11.1 **KERAJAAN** berhak untuk melantik mana-mana pihak ketiga untuk memberikan Perkhidmatan tersebut di bawah Perjanjian ini sekiranya **KONTRAKTOR** gagal atau enggan untuk memberikan Perkhidmatan tersebut atau sebahagian daripadanya menurut Perjanjian ini dan semua kos yang telah dibayar oleh **KERAJAAN** kepada pihak ketiga itu hendaklah ditolak dari kos yang sepatutnya dibayar kepada **KONTRAKTOR**.
- 11.2 Sekiranya kos yang perlu dibayar oleh **KERAJAAN** bagi Perkhidmatan tersebut atau sebahagian daripadanya kepada pihak ketiga tersebut melebihi jumlah bayaran yang diperuntukkan dalam Perjanjian ini, maka **KERAJAAN** mempunyai hak untuk menuntut jumlah tersebut daripada **KONTRAKTOR**.

12 FORCE MAJEURE

- 12.1 **KONTRAKTOR** dan **KERAJAAN** adalah tidak bertanggungjawab bagi sebarang ketinggalan atau kegagalan dalam melaksanakan obligasi di bawah Perjanjian ini, jika ketinggalan atau kegagalan itu timbul daripada keadaan-keadaan **Force Majeure**. Dalam keadaan ini, yang menyebabkan mana-mana Pihak tidak dapat menyempurnakan Perjanjian ini, Perjanjian ini boleh ditamatkan dengan persetujuan Pihak-Pihak tanpa apa-apa pampasan. Kejadian Force Majeure hendaklah bermaksud:
- (a) peperangan (sama ada ia diisytiharkan atau tidak), pertempuran, penaklukan atau tindakan oleh musuh-musuh asing;
- (b) pemberontakan, revolusi, rampasan kuasa, perang saudara atau tindakan pengganas;
- (c) bencana alam termasuk, tetapi tidak terhad kepada gempa bumi, banjir, kebakaran spontan bawah tanah, ombak besar atau apa-apa bencana alam yang secara munasabahnyanya seseorang yang

berpengalaman tidak dijangka dapat mengambil langkah berjaga-jaga;

- (d) letupan nuklear, pencemaran radioaktif atau bahan kimia atau radiasi;
- (e) tekanan gelombang yang disebabkan oleh kapal terbang atau apa-apa peranti aerial yang bergerak dalam kelajuan sonik atau supersonik;
- (f) rusuhan, kekecohan atau kekacauan awam; atau
- (g) sebab-sebab atau bahaya-bahaya yang lain yang di luar kawalan mana-mana Pihak.

12.2 Jika berlaku sesuatu kejadian Force Majeure yang menyebabkan mana-mana Pihak tidak dapat melaksanakan apa-apa obligasinya di bawah Perjanjian ini (atau mana-mana bahagian daripadanya) yang terjejas akibat daripada kejadian Force Majeure tersebut, Pihak tersebut hendaklah dengan serta-merta memaklumkan akan kejadian Force Majeure tersebut kepada Pihak yang satu lagi dan diikuti dengan butir-butir terperinci mengenai kejadian Force Majeure dan kesannya terhadap pelaksanaan Perjanjian ini.

12.3 Mana-mana Pihak tidak boleh menggunakan mana-mana peruntukan dalam klausa ini jika Pihak-Pihak telah memutuskan secara munasabah bahawa satu kejadian Force Majeure tidak berlaku.

12.4 **KONTRAKTOR** hendaklah membuktikan bahawa kejadian Force Majeure betul-betul berlaku sebelum **KONTRAKTOR** dapat melepaskan obligasinya mengikut klausa 12.1.

12.5 Jika Perjanjian ini ditamatkan di bawah klausa 12.1 di atas, semua hak dan obligasi Pihak-Pihak di bawah Perjanjian ini hendaklah terhenti dan mana-mana Pihak tidak boleh membuat apa-apa tuntutan terhadap Pihak yang satu lagi dan masing-masing tidak bertanggungjawab terhadap satu sama lain melainkan berkaitan apa-apa hak dan liabiliti yang terakru sebelum berlakunya kejadian Force Majeure tersebut.

12.6 Bagi mengelakkan apa-apa keraguan, Pihak-Pihak kepada Perjanjian ini hendaklah terus melaksanakan obligasi masing-masing di bawah Perjanjian ini yang tidak terjejas, tertangguh atau terganggu oleh

kejadian Force Majeure dan obligasi berkenaan hendaklah terus berkuat kuasa sementara menunggu pelaksanaan peruntukan klausa ini.

- 12.7 **KERAJAAN** dan **KONTRAKTOR** tidak akan bertanggungjawab bagi apa-apa ketinggalan atau kegagalan untuk melaksanakan atau menjalankan obligasi di bawah Perjanjian ini jika ketinggalan atau kegagalan itu timbul dari sebab 'Force Majeure' termasuklah, tetapi tidak terhad kepada rusuhan atau kekacauan awam, mogok umum, kebakaran, banjir atau taufan peperangan, bahaya lalit, gempa bumi atau sebab-sebab atau kejadian-kejadian yang lain di luar kawalan mana-mana Pihak.
- 12.8 Jika berlaku sesuatu kejadian Force Majeure yang menyebabkan mana-mana Pihak tidak dapat melaksanakan apa-apa obligasi di bawah Perjanjian ini, Pihak tersebut hendaklah serta-merta mengemukakan notis bertulis memaklumkan kejadian Force Majeure tersebut kepada Pihak yang satu lagi (selepas daripada ini dirujuk sebagai "**NOTIS FORCE MAJEURE**") dan diikuti dengan butir-butir terperinci mengenai kejadian Force Majeure dan kesannya terhadap pelaksanaan Perjanjian ini.
- 12.9 **KERAJAAN** berkuasa untuk menamatkan Perjanjian ini sekiranya kejadian Force Majeure berterusan untuk tiga puluh (30) hari daripada NOTIS FORCE MAJEURE, dan semua hak dan obligasi Pihak-Pihak di bawah Perjanjian ini hendaklah terhenti dan mana-mana Pihak tidak boleh membuat apa-apa tuntutan terhadap Pihak yang satu lagi melainkan berkaitan dengan Nilai Pembayaran bulanan yang terakru sebelum kejadian Force Majeure tersebut yang kena dibayar secara serta-merta oleh **KERAJAAN** kepada **KONTRAKTOR**.

13 PEMERIKSAAN OLEH KERAJAAN

KONTRAKTOR hendaklah membenarkan **KERAJAAN** atau mana-mana pihak yang diberi kuasa oleh **KERAJAAN** pada bila-bila masa menjalankan pemeriksaan bagi mengenal pasti tahap pencapaian **KONTRAKTOR** dalam melaksanakan Perkhidmatan tersebut dan apabila perlu, hendaklah mematuhi apa-apa arahan yang diberikan oleh **KERAJAAN** bagi maksud Perjanjian ini.

14 PENOLAKAN

KERAJAAN berhak untuk menolak apa-apa wang yang terhutang kepada **KERAJAAN** oleh **KONTRAKTOR** dengan menolak jumlah itu daripada wang

yang terhutang dan kena dibayar kepada **KONTRAKTOR** di bawah Perjanjian ini atau mana-mana perjanjian yang sedia ada yang lain yang telah dibuat antara **KERAJAAN** dengan **KONTRAKTOR**.

DENGAN SYARAT peruntukan ini tidak menjejaskan apa-apa remedi lain yang **KERAJAAN** berhak bagi mendapatkan apa-apa wang.

15 PENGENAAN PENALTI

15.1 Tertakluk kepada klausa 11 di atas, **KERAJAAN** juga sentiasa berhak mengenakan penalti sejumlah sepuluh peratus (10%) daripada kos perbelanjaan daripada pembekalan punca-punca lain terhadap **KONTRAKTOR** sebagai kos pentadbiran.

15.2 Sekiranya **KONTRAKTOR** gagal untuk memberikan Perkhidmatan tersebut sebagaimana yang dinyatakan dalam Perjanjian ini dan sekiranya kegagalan tersebut telah berterusan selama tujuh (7) hari, maka Kerajaan sentiasa berhak mengikut apa-apa peratusan atau nilai yang difikirkan patut oleh Kerajaan, memotong apa-apa wang yang kena dibayar oleh **KERAJAAN** kepada **KONTRAKTOR** bagi setiap kegagalan melaksanakan kerja dalam Perkhidmatan tersebut.

15.3 Hak **KERAJAAN** di dalam klausa ini adalah sebagai tambahan kepada dan tanpa menyekat hak-hak Kerajaan yang lain sama ada secara nyata atau tersirat di dalam Perjanjian ini atau di sisi undang-undang untuk menuntut ganti rugi daripada **KONTRAKTOR** kerana gagal melaksanakan oblogasinya di bawah Perjanjian ini.

16 PERUNTUKAN MAKLUMAT

KONTRAKTOR hendaklah secepat yang dapat dilaksanakan menjawab kepada apa-apa pertanyaan daripada **KERAJAAN**, dan hendaklah dengan segera memberi jika dibenarkan oleh undang-undang, maklumat, rekod, penyata, laporan, data dan apa-apa bahan atau dokumen lain yang diminta oleh **KERAJAAN** berhubung dengan Perjanjian ini.

17 PENYERAHHAKKAN ATAU NOVASI

KONTRAKTOR tidak boleh, tanpa kebenaran bertulis daripada **KERAJAAN** terlebih dahulu, menyerahkan atau memindahkan kepada pihak ketiga semua atau mana-mana manfaat atau obligasi dalam Perjanjian ini.

18 TANGGUNG RUGI

KONTRAKTOR BERSETUJU BAHAWA –

- (a) **KONTRAKTOR** hendaklah menanggung rugi **KERAJAAN** berkaitan dengan apa-apa kerugian, ganti rugi, bayaran atau kos yang mungkin ditanggung atau dikenakan ke atas **KERAJAAN** berkenaan dengan apa-apa tuntutan, tanggungan, prosiding atau perbicaraan yang timbul secara langsung atau tidak langsung akibat kemungkiran **KONTRAKTOR**, ejen atau pekerjanya terhadap mana-mana terma dan syarat Perjanjian ini dengan syarat apa-apa kerugian, ganti rugi, bayaran atau kos berkenaan tidak berpunca daripada tindakan atau tinggalkan yang cuai yang disebabkan oleh **KERAJAAN** dalam melaksanakan mana-mana terma dan syarat Perjanjian ini;
- (b) **KONTRAKTOR** hendaklah menanggung rugi **KERAJAAN** berkaitan dengan apa-apa kerugian terhadap apa juga tindakan berkaitan dengan pelanggaran hak harta intelek oleh **KONTRAKTOR** kerana mengguna atau menjual mana-mana perkakasan yang dibekalkan oleh **KONTRAKTOR** dan terhadap segala belanja dan ganti rosak yang **KERAJAAN** mungkin lakukan dalam suatu tindakan kerana pelanggaran itu atau yang **KERAJAAN** mungkin bertanggungjawab dalam suatu tindakan itu;
- (c) **KERAJAAN** tidak akan menanggung apa-apa liabiliti untuk apa-apa ganti rugi atau pampasan kepada sesiapa yang berada dalam penggajian **KONTRAKTOR** atau sesiapa yang lain yang mengakibatkan kerosakan kepada harta benda seseorang atau kecederaan, maut atau tidak, atau kerugian yang berakibat daripada mana-mana tindakan atau keingkaran **KONTRAKTOR**, pekerja-pekerjanya atau ejen-ejennya yang mana **KERAJAAN** akan dijadikan bertanggung dari segi undang-undang.

19 IKLAN

Tiada iklan mengenai Perjanjian ini boleh disiarkan dalam mana-mana akhbar, majalah atau apa-apa media pengiklanan yang lain melainkan jika pengiklanan itu telah terlebih dahulu memperoleh kelulusan bertulis **KERAJAAN**.

20 KOS PERJANJIAN DAN DUTI SETEM

Apa-apa kos dan duti setem yang kena dibayar berkenaan dengan Perjanjian ini hendaklah ditanggung oleh **KONTRAKTOR**.

21 JAWATANKUASA PENYELESAIAN PERTIKAIAN

21.1 Apa-apa pertikaian antara Pihak-Pihak di bawah Perjanjian ini hendaklah dirujuk kepada Jawatankuasa Penyelesaian Pertikaian yang terdiri daripada—

- (a) Ketua Pentadbir Parlimen Malaysia atau wakilnya sebagai Pengerusi;
- (b) dua (2) wakil yang dilantik daripada **KERAJAAN**; dan
- (c) dua (2) wakil yang dilantik daripada **KONTRAKTOR**.

21.2 Pakar Bebas

Jawatankuasa Penyelesaian Pertikaian boleh melantik seorang pakar bebas bagi memberi nasihat ke atas apa-apa perkara yang dirujuk kepadanya dan segala kos, yuran dan perbelanjaan yang ditanggung oleh pakar bebas yang dilantik tersebut hendaklah dikongsi sama rata oleh Pihak-Pihak.

21.3 Penyelesaian Secara Baik

Jawatankuasa Penyelesaian Pertikaian hendaklah menentukan prosedur-prosedur bagi mencapai penyelesaian. Jawatankuasa Penyelesaian Pertikaian hendaklah berjumpa dan berusaha untuk mencapai penyelesaian secara baik antara Pihak-Pihak tentang perkara yang dirujuk kepadanya.

21.4 Kegagalan Mencari Penyelesaian

Jika apa-apa perkara, pertikaian atau tuntutan yang dirujuk kepada Jawatankuasa Penyelesaian Pertikaian tidak dapat dipersetujui oleh Pihak-Pihak dalam masa tiga puluh (30) hari selepas tarikh kes dirujuk, maka kedua-dua Pihak bolehlah merujuk perkara, pertikaian atau tuntutan tersebut kepada penimbang tara menurut klausa 22.

22 TIMBANG TARA

(a) Rujukan kepada Timbang Tara

Apa-apa pertikaian yang terbit antara **KERAJAAN** dengan **KONTRAKTOR** di bawah Perjanjian ini mengenai penafsiran, pengertian, atau kuat kuasa Perjanjian atau hak dan tanggungan Pihak-Pihak di dalamnya atau apa-apa perkara yang terbit daripadanya atau yang berhubung dengannya yang tidak boleh diselesaikan secara rundingan bolehlah dirujuk dan diputuskan oleh seorang penimbang tara yang dilantik dengan persetujuan kedua-dua Pihak, atau oleh Ketua Pengarah, Pusat Timbang Tara Serantau Kuala Lumpur ("Pusat itu"). Apa-apa rujukan sedemikian hendaklah disifatkan sebagai pengemukaan kepada penimbang tara mengikut Akta Timbang Tara 2005 [Akta 646]. Apa-apa keputusan yang dibuat oleh penimbang tara adalah muktamad.

(b) Tempat

Prosiding timbang tara hendaklah dijalankan di Pusat itu dengan menggunakan segala peralatan dan kemudahan di Pusat itu dan segala peraturan timbang tara yang dipakai di Pusat itu hendaklah terpakai.

(c) Obligasi Berterusan

Apa-apa rujukan kepada mana-mana perkara, pertikaian, persoalan atau tuntutan kepada timbang tara selaras dengan klausa ini dan/atau pelanjutan prosiding timbang tara akibat daripadanya bukanlah suatu pengenehan terhadap apa-apa obligasi **KERAJAAN** dan **KONTRAKTOR** untuk melaksanakan obligasi masing-masing di bawah Perjanjian ini.

23 KERAHSIAAN

- 23.1 Bagi maksud Perjanjian ini, maklumat rahsia di bawah Perjanjian ini bermaksud, semua maklumat (sama ada berkenaan komersial, kewangan, teknikal atau sebagainya) yang berkaitan dengan mana-mana Pihak kepada Perjanjian ini, subkontraktor, pelanggan lain, pekerjaanya atau sebagainya, yang didapati atau diberikan oleh Pihak yang satu lagi.

23.2 Kedua-dua Pihak kepada Perjanjian ini mengakujnji –

- (a) untuk menganggap maklumat rahsia tersebut sebagai rahsia;
- (b) untuk tidak akan, tanpa kebenaran Pihak yang satu lagi, berkomunikasi atau memberitahu mengenai mana-mana bahagian daripada maklumat rahsia tersebut kepada mana-mana orang kecuali kepada mana-mana pekerjaanya, ejen dan subkontraktor yang terlibat secara langsung dengan Perjanjian ini dan yang perlu mengetahui maklumat rahsia itu bagi maksud memenuhi kewajiban **KONTRAKTOR** di bawah Perjanjian ini; dan
- (c) untuk tidak menggunakan atau menyebarkan maklumat rahsia dalam organisasi mana-mana Pihak kecuali jika ia adalah perlu di bawah Perjanjian ini.

23.3 Klausula 23 hendaklah berkuat kuasa wujud selepas peluputan atau penamatan Perjanjian ini atas apa-apa sebab pun.

23.4 Sekiranya **KONTRAKTOR** gagal mematuhi peruntukan di bawah klausula ini, **KONTRAKTOR** boleh didakwa di bawah Akta Rahsia Rasmi 1972 atau undang-undang lain yang berkaitan atau ditamatkan Perjanjiannya atau kedua-duanya sekali.

24 UNDANG-UNDANG YANG TERPAKAI BAGI PERJANJIAN

Perjanjian ini hendaklah ditadbir dan ditafsir mengikut undang-undang Malaysia dan Pihak-Pihak kepada Perjanjian ini bersetuju untuk patuh kepada bidang kuasa eksklusif Mahkamah Malaysia.

25 PEMATUHAN KEPADA UNDANG-UNDANG

Pihak-Pihak kepada Perjanjian ini bersetuju untuk mematuhi segala ketetapan Akta, ordinan, enakmen, peraturan-peraturan yang berkuat kuasa atau undang-undang kecil, arahan atau pekeliling yang dikeluarkan oleh Kerajaan Persekutuan, Kerajaan Negeri atau mana-mana Pihak Berkuasa Tempatan/Pihak Berkuasa Negeri dari semasa ke semasa.

26 NOTIS

- 26.1 Jika dalam melaksanakan peruntukan Perjanjian ini suatu notis diperlukan, notis tersebut hendaklah diberikan secara bertulis dan dihantar dengan pos berdaftar atau diserahkan ke alamat seperti yang berikut:

(A) KERAJAAN :

Ketua Pentadbir Parlimen Malaysia

Di alamat:

Parlimen Malaysia

Bangunan Parlimen

Jalan Parlimen

50680 KUALA LUMPUR.

Tel. : 03-2072 1955

E-mel : info@parlimen.gov.my

(B) KONTRAKTOR:

.....
Di alamat:
.....
.....
.....

- 26.2 **KONTRAKTOR** hendaklah memberikan notis bertulis kepada **KERAJAAN** dalam masa **empat belas (14) hari** dari tarikh pertukaran alamat jika berlaku pertukaran sedemikian.

27 PENAFIAN

- 27.1 Kegagalan **KERAJAAN** atau **KONTRAKTOR** untuk melaksanakan atau menguatkuasakan pada bila-bila masa atau untuk suatu tempoh atau lebih apa-apa terma dan syarat Perjanjian ini tidak akan menjadi penepian kepada terma dan syarat Perjanjian ini atau haknya pada bila-bila masa seterusnya untuk **KERAJAAN** atau **KONTRAKTOR** menguatkuasakan semua atau mana-mana terma atau syarat Perjanjian ini.
- 27.2 Apa-apa penepian mana-mana hak **KERAJAAN** di bawah Perjanjian ini adalah tidak sah melainkan ia dibuat secara bertulis dan ditandatangani

oleh wakil **KERAJAAN** atau seorang pegawai lain yang telah diberi kuasa olehnya.

28 KEBOLEHASINGAN

Jika mana-mana klausa di bawah Perjanjian ini didapati menyalahi undang-undang, tidak sah atau tidak boleh dikuatkuasakan di bawah undang-undang pada masa kini atau undang-undang pada masa hadapan, klausa tersebut hendaklah diasingkan sepenuhnya dan Perjanjian ini hendaklah ditafsir dan dikuatkuasakan seolah-olah klausa yang menyalahi undang-undang, tidak sah atau tidak boleh dikuatkuasakan tersebut tidak pernah terkandung sebagai sebahagian daripada Perjanjian ini dan klausa-klausa lain hendaklah kekal berkuat kuasa sepenuhnya dan mempunyai kesan seolah-olah Perjanjian ini telah diikat tanpa klausa yang menyalahi undang-undang, tidak sah atau tidak boleh dikuatkuasakan tersebut.

29 LAMPIRAN

Semua lampiran yang disertakan menjadi sebahagian dan dibaca bersama dengan Perjanjian ini.

30 MASA

Masa bila mana disebut hendaklah menjadi intipati Perjanjian ini.

31 PINDAAN

Apa-apa pindaan atau ubah suaian kepada Perjanjian ini hendaklah dipersetujui oleh **KERAJAAN** dan **KONTRAKTOR** yang dibuat secara bertulis dalam bentuk Perjanjian Tambahan serta disahkan dan ditandatangani oleh kedua-dua Pihak.

32 KOS

KONTRAKTOR hendaklah menanggung sendiri semua kos guaman dan apa-apa kos lain yang berkaitan dengan Perjanjian ini.

PADA MENYAKSIKAN HAL DI ATAS kepada Perjanjian yang bertindak melalui wakil-wakil yang diberi kuasa dengan sewajarnya bagi maksud itu yang menyebabkan Perjanjian ini ditandatangani atas nama mereka masing-masing pada tarikh yang dinyatakan di muka surat permulaan.

Ditandatangani oleh)
)
Nama:)
Jawatan:)
No. KP:)
Untuk dan bagi pihak)
KERAJAAN MALAYSIA)
Tarikh:)

Dan disaksikan oleh:)
)
Nama:)
Jawatan:)
No. KP:)
Tarikh:)

Ditandatangani oleh)
)
Nama:)
Jawatan:)
No. KP:)
Untuk dan bagi pihak)
Tarikh:)

Dan disaksikan oleh:)
)
Nama:)
Jawatan:)
No. KP:)
Tarikh:)

BIL	BULAN	PUSINGAN PERTAMA	PUSINGAN KEDUA	PUSINGAN KETIGA	CATATAN
1	JUN 2019	01.06.2019- 10.06.2019	11.06.2019- 20.06.2019	21.06.2019- 30.06.2019	
2	JULAI 2019	01.07.2019- 10.07.2019	11.07.2019- 20.07.2019	21.07.2019- 31.07.2019	
3	OGOS 2019	01.08.2019- 10.08.2019	11.08.2019- 20.08.2019	21.08.2019- 31.08.2019	
4	SEPTEMBER 2019	01.09.2019- 10.09.2019	11.09.2019- 20.09.2019	21.09.2019- 30.09.2019	
5	OKTOBER 2019	01.10.2019- 10.10.2019	11.10.2019- 20.10.2019	21.10.2019- 31.10.2019	
6	NOVEMBER 2019	01.11.2019- 10.11.2019	11.11.2019- 20.11.2019	21.11.2019- 30.11.2019	
7	DISEMBER 2019	01.12.2019- 10.12.2019	11.12.2019- 20.12.2019	21.12.2019- 31.12.2019	